



Protocol dalla radunanza communal digl cumegn da Surses digls 29 d'avost 2022 (nr. 04-2022)

Li ed oura	Sala Grava a Savognin, allas 20.00
Preschaints:	131 votantas e votants
Parsoura:	Leo Thomann, mastral
Actuar:	Beat Jenal, canzlist
Stgiso:	Suprastant Adrian Ballat

1. Bavagnaint ed elecziun digls dombravouschs

Igl mastral benevainta las persungas preschaintas alla radunanza communal. Siva d'ena curta infurmaziun davart igl adiever digl lungatg e la practica da rediger e publitzier igl protocol dalla radunanza communal, constatescha igl mastral tgi la radunanza communal odierna seia neida convocada conform alla constituziun, uscheia tgi ella seia cumpetenta da decider.

Tractandas:

1. Bavegna ed elecziun digls dombravouschs
2. Project d'investiziun «Arena da sport La Nars, Savognin»: cunsegliazion e deliberaziun digl affar davart en credit supplementar per mangs digl cumegn d'urna Surses
3. Project d'investiziun «construcziun luvratori communal Surses»: cunsegliazion e deliberaziun digl affar davart igl credit d'impegn per mangs digl cumegn d'urna Surses
4. Project d'investiziun «construcziun staziun da trafo TS 1 e TS 2 a Tinizong» an connex cun la rezgia dalla ReSurses SA: dumonda per credit d'object brut da CHF 700'000.00
5. Vendita dall'antieriura tgesa communal a Marmorera (parcella nr. 12043) an possess digl cumegn da Surses
6. Compra dalla hetta (parcella nr. 11188, Tgesa da Sett, Bivio) an possess dallas Ovras electricas digl martgea da Turitg (ewz): dumonda per credit d'object da CHF 250'000.00
7. Diversas infurmaziuns
8. Varia

Cunter la glista da tractandas na vignan fatgas nignas objecziuns, uscheia tgi chella vala scu approvada.

Scu dombravouschs vignan proponias ed eligias cun gronda pluralitad Albert Netzer, Karin Hersche, Pauli Dosch e Martegn Caspar.

2. Project d'investiziun «Arena da sport La Nars, Savognin»: cunsegliazion e deliberaziun digl affar davart en credit supplementar per mangs digl cumegn d'urna Surses

Igl mastral infurmescha tg'igl cumegn d'urna Surses vegia approvo a caschung dalla votaziun all'urna digls 13 da mars 2022 igl credit d'impegn da CHF 4'500'000.00 francs per realisar l'Arena da sport La Nars a Savognin. Aint igl frataimp seian las planisaziuns da detagl neidas concretisadas e per gronda part terminadas. Numerusas publicaziuns ed amprenas surdadas da lavour seian gio succedeidas e cun l'amprema badigleida igls 4 da fanadour seia igl project nia mess an veia.

A basa digl grad da planisaziun detaglea ed allas offertas tgi seian neidas inoltradas seiigl sa musso tg'igl credit dumando da CHF 4'500'000.00 na tanscha betg per realisar igl project da construcziun scu preschento all'urna. Las calculaziuns fatgas mossan tgi dovra en credit

supplementar da CHF 1'100'000.00, infurmescha igl mastral cun declarar igls divers muteivs tgi on mano a chels costs supplementars (optimaziun digl project posteriourmaintg alla deliberaziun digl credit da CHF 4'500'000.00; la ghera ainten l'Ucraina cun la gronda malsiertad sen la fiera mundiala e cotras ena carascheia considerabla sen divers products e materials; offertas pi otas digls impressarias per las singulas lavours percheigl tgi igls carnets d'ordinaziuns èn plagns). Causa tgi las bleras interpresas vegian igls carnets d'ordinaziuns plagns e vegian cotras nignas capacitads da surpiglier las lavours dumandadas ins vegia er decida da realisar l'Arena da sport La Nars an dus etappas: chest onn igl magasign e las plazzas da sport ed igl 2023 igl bietg da menaschi e la finiziun dallas plazzas da tennis.

L'avertura digl antier stabilimaint Arena da sport La Nars seia planisada per la fegn d'aton 2023, infurmescha igl mastral.

Alla fegn dallas expectoraziuns digl mastral peglian divers votants igl pled e dattan giu per la gronda part votums cunter igl project resp. igl credit supplementar. Igls votums vignan resumos scu suonda:

- Ins sa mossa sursto tgi la suprastanza propona da far en travagl sur onn. Ansasez seia adegna nia detg, tgi l'ustareia a La Nars vigna manada angal igl anviern. Pertge ins vot far ossa tottanegna en travagl d'ustareia sur onn?
- I vign fatg la proposta da dar anavos igl affar alla suprastanza cun l'incumbensa da surluvar igl project.
- En travagl sur onn a La Nars funcziunescha betg, chegl gio angal percheigl tgi dat nigns parcadis ainta La Nars.
- Tgapientscha per igl fatg tgi tot seia nia pi tger. I seia pero betg pussebel da manar a La Nars en travagl sur onn, resp. tge seia ansomma managea cun en "travagl sur onn"? Seia managea tgi l'ustareia seia daverta mintga de, 365 deis ad onn?
- Dattigl en plan B per cass tg'igl travagl previa sur onn vess betg da funcziunar?
- Avant 5 meis vegia igl cumegn d'urna Surses concedia en credit da 4.5 miu. francs. Ed ossa dumonda la suprastanza anc en credit da 1.1. miu. francs. Chegl seia betg serious.
- I dovra ena bung'infrastructura a La Nars, pero betg aint igl rom digl project sottamess.
- A caschung dalla sanaziun totala digl kiosk agl Lai Barnagn avant en pèr onns seia nia fatg ena proposta da far en'ustareia cuverta. Igl argumaint dalla suprastanza incl. digls responsabels digl turissem cunter chella proposta seia sto da betg leir concurrenzar la gastronomia an vischnanca. Ossa ins veglia pero far en'ustareia a La Nars cun l'intenziun da la manar sur onn! Chegl seia betg consequent.
- La proposta da dar anavos igl project alla suprastanza per igl surluvar vigna mengia tard. Ins vegia detg A ed ossa seia er da deir B. Ins vegia do or mengia blers daners per ossa metter an dumonda tot.
- Scu vot igl cumegn finantzgier tot igls projects turistics? Ègl previa da dulzar la taxa da giasts u vignan chels projects turistics realisos adegna cun daners da taglia? I na possa betg esser tgi vigna fatg tot cun daners da taglia.
- I vign giavischia da santeir igl pareri digl president dalla cumischung da gestiun an connex cun la dumonda digl credit supplementar.

Resumaziun dallas raspostas dalla suprastanza communal e dalla cumischung da gestiun:

- Ins vegia communitgia gio a caschung dalla davosa radunanza communal tg'ins vegia previa da manar en travagl d'ustareia sur onn.
- Cun travagl sur onn seia managea tgi durant la staschung d'anviern duess l'ustareia esser daverta 7 deis l'emda e da stad aglmanc 4 deis l'emda. Durant la staschung morta vegia l'ustareia betg d'esser daverta.
- Ins vegia en interessent per manar igl travagl a La Nars. Chel seia persvadia tgi en travagl da stad e d'anviern possa funcziunar. Igl contract da fit tg'ins preveia da far cun chella persunga geia sur en pèr onns. En plan B per cass tg'igl travagl na funcziuness betg, ins vegia betg! Er percheigl tg'ins seia persvadia tg'igl travagl planiso funcziuna.
- La Turissem Savognin Bivio Albula SA vegia gio proponia alla suprastanza communal da dulzar las taxas da giasts. La suprastanza vegia dantant piglia anc nigla decisiun an tgossa.

Igl president dalla cumischung da gestiun infurmescha tg'ins seia adegna sto infurmo digl project. L'incumbensa dalla cumischung da gestiun seia da controllar tgi vigna tignia aint las leschas e las decisiuns digls organs comunals. Igls commembers dalla cumischung da gestiun possan confirmar d'aveir constato nigns sbagls formals dalla vart dalla suprastanza.

Igl votant Otmar Netzer stat tar la sia proposta da dar anavos igl project alla suprastanza cun l'incumbensa da surluvrar igl project.

Resultat dallas votaziuns:

Gl'amprem metta igl mastral an votaziun la proposta da votant Otmar Netzer da ranvier igl affar alla suprastanza cun l'incumbensa da surluvrar igl project. Cun 27 vuschs EA e 74 vuschs NA vign la proposta negada.

Siva vign mess an votaziun la dumonda per l'approvaziun digl credit supplementar. Cun 88 vuschs EA cunter 26 vuschs NA decida la radunanza da deliberar igl affar davart igl credit supplementar da 1.1 miu. francs per realisar igl project "Arena da sport La Nars" per mangs digl cumegn d'urna digls 25 da settember 2022 cun la proposta per l'approvaziun.

3. Project d'investiziun «construcziun luvratori communal Surses»: consegliaziun e deliberaziun digl affar davart igl credit d'impegn per mangs digl cumegn d'urna Surses

Igl mastral infurmescha tgi seia necessari da biagier en nov luvratori communal, cunchegl tgi las localitads aint igl bietg polivalent Grava a Savognin, tgi vignan nizigeidas ossa digl sarvetsch communal, vignan duvradas an futur per la scola primara.

Per la suprastanza seian nias an dumonda 3 lis per la construcziun digl nov luvratori:

- a Cunter, Gravas, noua tgi sa cattava igl stand da sagettar per armas a caliber pitschen (parcelas nr. 5339/5443)
- a Cunter, zona d'industria Gravas, sen igl areal, noua tgi sa cattan actualmaintg las hallas da menaschi dalla firma "vonbüren restaurieren" (parcelas nr. 5449/5450).
- a Savognin, Davos Fallung, gist dasper la deponia (parcella nr. 3954)

La radunanza communal digls 7 da favrer 2022 vegia alloura decida da fixar igl li per igl nov luvratori communal sen igl areal dalla firma "vonbüren restaurieren" a Cunter. Alla basa da chella decisiun seia la suprastanza sa fatschantada intensivamaintg cun igl standard dalla construcziun digl nov luvratori communal. La fegnameira seia da biagier en luvratori communal tgi pussibiltescha da reglar las lavours an moda effizianta ed economica e tgi porscha plaz avonda per biros e gardarobas per igls collaboratours scu er per metter sot tetg l'isaglia ed igls vehichels.

Igl mastral daclera tge maseiras da construcziun tgi fissan necessarias per transfurmar las hallas dalla firma "vonbüren restaurieren" an en luvratori communal tgi corresponda agls basigns digl sarvetsch communal. An spezial vign menziuno, tgi en'expertisa dalla statica dalla halla agl nord vegia musso, tg'ins possa betg installar an chella en scoldamaint. I seia pero absolutamaintg necessari da pudeir scaldar la halla per saveir metter sot tetg las maschinas digl sarvetsch d'anviern. I dovra betg en scoldamaint convenziunal, i tanscha en scoldamaint cun aria tgoda per aveir ena temperatura da ca. 10 grads, precischescha igl mastral. Ainten la halla agl nord seiigl pero betg pussebel da far chegl, sainza la sbuar e reconstrueir da nov. Per evitar da stueir far chegl ins vegia tschartgea otras schliaziuns. Alla fegn ins seia nia alla conclusiun tgi la varianta la pi simpla e bunmartgeda fiss d'installar en scoldamaint ainten la halla existenta digl luvratori communal tar la deponia a Davos Fallung. Chella halla vigna numnadamaintg duvrada e nizigeida er siva dalla construcziun digl nov luvratori communal a Cunter.

Igls costs d'investiziun sa cumponan scu suonda:

- Compra dallas hallas da biro e da menaschi existentas dalla firma vonbüren restaurieren (sainza magasign cun regals ots), Cunter	CHF	1'270'000.00
- Costs digl codesch funsil e digl geometer ed oters costs accessoris	CHF	60'000.00
- Renovaziun dallas hallas da biro e da menaschi a Cunter (incl. costs da planisaziun)	CHF	1'250'000.00
- Renovaziun digl luvratori a Davos Fallung (incl. costs da planisaziun)	CHF	420'000.00
- Imprevia, reserva	CHF	250'000.00
Costs totals		CHF 3'250'000.00

Alla fegn infurmescha igl mastral tg'igl magasign cun regals ots tgi sa catta er segl areal dalla firma "vonbüren restaurieren" na vigna betg duvro pigl luvratori communal e vigna an chel senn er betg cumpro digl cumegn. Igl proprietari dalla firma igl possa vender a terzas persungas.

Siva las sias explicaziuns derva igl mastral la discussiun.

Dalla discussiun vign fatg adiever e ples votants peglian igl pled. Igl votums vignan resumos scu suonda:

- Igl project preschanto oz seia betg optimal. Ins vess an futur en po material e vehichels a Cunter, en po a Davos Fallung ed en po sen la rezgia viglia da Savognin. I vign fatg la proposta da dar anavos igl affar alla suprastanza cun l'incumbensa d'elaborar en project a Davos Fallung.
- Igl li a Davos Fallung dasper la deponia seia fitg bung per biagier igl nov luvratori communal. Lò fissigl pussebel da realisar en luvratori per max. 2 miu. francs.
- Igl project preschanto oz persvada betg ma costa tuttegna 3.25 miu. francs. I vala la pagna da dar anavos igl affar per tg'ins possa surluvrar anc eneda igl project e reponderar la decisiun digl li.
- I mantga en'analisa davart l'economia da menaschi e schi seia persistent da far igl menaschi a Cunter, schi la gronda part dalla labour vigna fatga a Savognin. Chellas analisas duvressigl per disponer d'ena basa da decisiun.
- Igl costs da compra da 1.27 miu. francs per las hallas dalla firma "vonbüren restaurieren" seian bler mengia ots.
- Ins vegia da vurdar pigl bagnstar digl cumegn e betg per angarscher ena persunga privata.
- La halla agl nord or a Cunter seia neida messa se igl onn 80 cun costs minimal. Digl reminent seiigl sto ena halla d'ocasiun. La halla seia alloura neida vandeida agl proprietari actual per en prietsch fitg modest. Las hallas existentas vegian diversas mancanzas e sch'ins varda giu igls bietgs ins stoptga deir tgi chels seian betg ple adattos agl taimp dad oz ed i sa tracta pitost d'ena "castradeira". Ultra da chegl ins dastga betg amblidar igl taimp tg'igls luvrants digl sarvetsch communal perdan mintga de cun neir da Cunter ainta Savognin, considerond tgi la gronda part dalla labour seia a Savognin.
- Siva dalla radunanza communal digls 7 da favrer ins vegia santia fitg schlet digl li previa or a Cunter. Sch'ins compra en bietg existent, ins seia liia ve da tschertas grondezzas ed otezzas. Sch'ins viglia far ensatge andretg fissigl da sbuar tot e far da nov. Cun oters plects, nous paessan 1.27 miu. francs e vessan la fegn finala angal igl taragn, tgi totga digl reminent gio agl cumegn!
- Igl luvrants digl sarvetsch communal seian er betg cuntaints cun igl project preschento. I seia da tadlar sen igls luvrants tgi vegian da luvrar lò mintga de.

Resumaziun dallas raspuestas dalla suprastanza communal:

- Igl mastral sa mossa sursto digls votums da chesta seira. A caschung dalla radunanza communal digls 7 da favrer vegia la suprastanza proponia da far igl luvratori communal a Davos Fallung, cun preics chels argumaints tgi seian nias menziunos chesta seira. El sa dumonda percheigl, pertge tgi la radunanza communal digls 7 da favrer vegia alloura sa decida per igl li a Cunter?! En argumaint seia sto p.ex., tg'ins viglia betg tot igl travagl digl sarvetsch communal tras igl center turistic da Savognin.
- Per antrar sen ena proposta da reponderaziun dalla decisiun dalla radunanza communal digls 7 da favrer 2022 dovrigl ena pluralitad da dus terzas dallas votantas e digls votants preschaints chesta seira.
- I seia betg franc schi seia ansomma pussebel da realisar en luvratori a Davos Fallung. D'ena vart perveia dalla distanza tigl gôt e da l'otra vart perveia digl spazi dall'ava.

Votant Guido Luzio stat tar la sia proposta da dar anavos igl affar alla suprastanza cun l'incumbensa d'elaborar en project a Davos Fallung.

Votant Armando Janett propona da far la votaziun davart la proposta da ranvieida sot scrutini.

Resultats dallas votaziuns:

Gl'amprem lascha igl mastral votar davart la proposta da far la votaziun sot scrutini. Chella proposta vign acceptada cun 69 vuschs.

Siva vign mess an votaziun la proposta da ranviier igl affar alla suprastanza cun l'incumbensa d'elaborar en project a Davos Fallung dasper la deponia. Chella proposta vign acceptada cun 89 vuschs EA cunter 34 vuschs NA. Uscheia vala igl affar scu ranviia.

Igl mastral infurmescha tgi la suprastanza vegia ossa da decider sch'ins viglia sottametter alla radunanza communal ena proposta da reponderaziun davart igl li u sch'ins viglia spitgier e sottametter igl affar pir siva tgi en onn digl conclus correspondent dalla radunanza communal

digls 7 da favrer 2022 seia spiro. Cun spitgier anfignen alloura ins vegia betg da lascher votar davart la reponderaziun digl li.

4. Project d'investiziun «construcziun staziun da trafo TS 1 e TS 2 a Tinizong» an connex cun la rezgia dalla Resurses SA: dumonda per credit d'object brut da CHF 700'000.00

Igl mastral infurmescha tgi an connex cun la construcziun dalla rezgia dalla Resurses SA a Tinizong seiigl sto cler tgi vigna a duvrar pigl menaschi ena prestaziun pi ota da retrer energieia electrica. L'Ovra electrica Surses vegia survagnia igl onn 2021 dalla Resurses SA ena dumonda da colliaziun correspondententa per l'examinaziun. A basa da chella dumonda vegia la radunanza communal risguardo en import da CHF 200'000.00 aint budget 2022 per construeir ena nova staziun da trafo.

Cun igl progress digl project seia s'augmentada veapi fitg la prestaziun consecutiva necessaria. Igl mez favrer 2022 vegia la ReSurses SA alloura pusto radond 1'677 kVA (kilovoltampere) prestaziun consecutiva cun inoltrar en aveis d'installaziun. Per saveir metter a disposiziun chella prestaziun consecutiva dovrigl da nov dus staziuns da trafo sen igl areal dalla nova rezgia, daclera igl mastral. Tottas dus staziuns da trafo seian gio neidas planisadas an collaboraziun cun igls patrungs da construcziun ed ins vegia per part gio per mangs da las construeir. Per betg antardar la construcziun dalla nova rezgia e perveia digls termins da furniziun fitg lungs ins vegia gio procuro per chellas incumbensas ed ampustaziuns. Igl mastral renda er attent, tgi tenor la lescha davart igl provedimaint d'electricitad digl cantun Grischun vegia la gestiunaria dalla reit da distribuziun locala, vot deir la OE Surses resp. igl cumegn, da garanteir la colliaziun da tot las consumentas finalas e da tot igls consuments finals sen tot igls nivels da tensiun.

Igls costs per la construcziun dallas dus staziuns da trafo montan a brut CHF 700'000.00. Da chels costs vignan surpiglias radond CHF 338'000.00 digl ewz e dalla Resurses SA, uscheia tgi restan agl cumegn costs nets da CHF 362'000.00. Tiers chegl vegia la Resurses SA er da paer agl cumegn las taxas d'attatg alla reit da CHF 251'550.00. Igl mastral concluda la sia preschentaziun cun accentuar l'impurtanza dalla rezgia per igl noss cumegn.

Or digl ravogls dalla radunanza vignan fatgas nignas dumondas.

Resultat dalla votaziun:

Sen proposta dalla suprastanza decida la radunanza communal cun 107 vouchs EA cunter 1 vouch NA d'approvar igl credit d'object brut da CHF 700'000.00 per la construcziun dallas dus novas staziuns da trafo TS1 e TS2 sen igl areal dalla rezgia dalla Resurses SA a Tinizong. Igl madem mument vign igl cumegn incumbenso cun l'execuziun.

5. Vendita dall'antieriura tgesa communal a Marmorera (parcella Nr. 12043) an possess digl cumegn da Surses

Vicemastral Giancarlo Torriani infurmescha tgi l'antieriura tgesa communal da Marmorera sa catta sen la parcella nr. 12043. La parcella vegia ena surfatscha da 760 m² e seia ainten la zona per edifezis publics. La tgesa seia neida construeida igl onn 1974 e vegia sarvia ca. 10 onns scu tgesa communal. Da lò annò seia la tgesa nunutilisada e siva dalla fusiun digl cumegn igl onn 2016 vegian gia li liaint angal ple singulas occurrenzas pitschnas.

Siva d'ena dumonda concreta igl onn 2019 vegia la suprastanza communal decida da publitzier l'antieriura tgesa communal per la vendita. Ins vegia survagnia lez mument angal en'offerta per la compra. Siva tgi la radunanza communal vegia gia consantia alla vendita dall'immobiglia vegia igl interessent alla fegn finala desistia dalla compra e l'immobiglia seia rastada an possess digl cumegn, daclera igl vicemastral. Ossa seia puspe avantmang en'offerta da compra da signour Arnaud Joseph Kieffer da Puntraschigna. Igl interessent viglia renovar la tgesa per intents d'abitar.

Agl cumprader seiigl ancunaschaint tgi existan diversas restricziuns an connex cun igl acquist da chella immobiglia. Igl edifezi dastga p.ex. neir nizigia angal scu abitaziun primara. Ultra da chegl dastga igl schler da protecziun civila betg neir biagia anturn e stoptga restar disponibel alla publicitad an cass d'urgenza. Pinavant exista per la Swisscom en dretg da passar cun lengias da cabels da telefon ed igl access agl indrez d'alarm digl cumegn tgi sa catta sen igl sotiglletg stoptga esser garantia da tot taimp. Risguardond chellas restricziuns vegia la suprastanza communal fixo igl prietsch da compra per l'immobiglia gio igl 2019 sen CHF 220'000.00, infurmescha igl vicemastral. En biro d'immobiglias extern vegia da lez taimp er gia considero chella somma per giustifitgeida.

Per cass tgi la compra sa concretisescha, vigna igl igl cumegn a zonar anturn l'immobiglia dalla zona per edifezis publics ainten la zona da vischnanca. Chegl possa succeder a caschung d'ena proxima revisiun dalla planisaziun locala. Igl vicemastral terminescha sias expectoraziuns cun menziunar tg'igl da cumegn da Surses vegia nign adiever concret per chella immobiglia, uscheia tgi ena vendita fetscha senn. Schiglio rastess igl edifezi anavant veid e nunutiliso.

Dalla discussiun daverta na vign betg fatg adiever.

Resultat dalla votaziun:

Sen proposta dalla suprastanza decida la radunanza communal cun 112 vouchs EA cunter 1 vouch NA da consanteir alla vendita dall'anterioura tgesa communal a Marmorera per en prietsch da CHF 220'000.00 agl interessent menziuno soura.

6. Compra dalla hetta (parcella nr. 11188, Tgesa da Sett, Bivio) an possess dallas Ovras electricas digl martgea da Turitg (ewz): dumonda per credit d'object da CHF 250'000.00

Igl cumegn da Surses vegia cumpro igl 2018 la hetta digl militer sen igl Pass digl Sett cun igl scopo da la transfurmar e nizigier scu tgamona per viandantas e viandants, infurmescha vicemastral Giancarlo Torriani. Chegl aint igl rom digl project Parc Ela-Trek, ena ruta da viandar a lunga distanza an 18 deis tras igl Parc Ela. Per la reconstrucziun planisada vegia la radunanza communal digls 30 d'avost 2021 approvo en credit brut da CHF 760'000.00. Las lavours da reconstrucziun cozzan anc e la tgamona vess d'esser pronta per l'utilisaziun per la stad 2023.

Gist dasper la tgamona seia la hetta dallas Ovras electricas digl martgea da Turitg (ewz). Chella hetta seia neida biageida da sies taimp scu cutier pigls montaders dallas lengias agl liber, las qualas igl ewz veva da mantigneir an chel territori, daclera igl vicemastral. Cun surdar la reit da transmissiun alla Swissgrid vegia igl ewz er surdo la responsabladad digl mantignamant dallas lengias alla Swissgrid. Consequentamaintg dovra igl ewz betg ple la hetta e vegia dumando percheigl agl cumegn sch'ins fiss interesse da comprar l'immobiglia.

Pigl cumegn fissigl raschunevel da comprar la hetta percheigl tgi sa dessan novas pusebladads an connex cun la gestiun dalla tgamona digl Parc Ela-Trek, accentuescha igl vicemastral. Ins savess p.ex. profitar dalla funtanga d'ava sen igl taragn dalla hetta ed igls manaders dalla tgamona pudessan abitar ainen la hetta digl ewz. Cotras stess ad disposiziun ainten la tgamona ena tgombra supplementara cun 2 letgs pigls giasts. Ultra da chegl fiss la Corporaziun d'alp Cavreccia/Settimo interessada da piglier a tschains la hetta.

Malgro tgi l'immobiglia digl ewz vegia tenor stema ena valeta considerablamaintg pi ota, seia igl ewz siva las tractativas cun igl cumegn sa musso pront da vender la parcella per en prietsch da CHF 250'000.00, infurmescha igl vicemastral.

Dalla discussiun daverta na vign betg fatg adiever.

Resultat dalla votaziun:

Sen proposta dalla suprastanza decida la radunanza communal cun 110 vouchs EA cunter 3 vouchs NA da conceder igl credit da CHF 250'000.00 per comprar la hetta digl ewz (parcella nr. 11188, Tgesa da Sett, Bivio).

7. Diversas infurmaziuns

Igl mastral infurmescha

- davart la seira d'infurmaziun tgi vign salvada igls 14 da settember per preschentar igl sboz dalla lescha d'alps, pastgiras e prada. L'infurmaziun sa drezza agls pors ed a tottas persungas interessadas.
- davart l'elecziun complementara per ena commembra aint igl cunsegl da scola. Igl termin d'annunzta seia spiro igls 26-08-2022. I seia neida inoltrada la proposta electorala per Anina Janett da Savognin.
- tgi da nov vigna infurmo sen la pagina web digl cumegn davart projects currents.
- tg'ins vegia installo ena nova purscheida per survagneir sen giaveisch via e-mail automaticamaintg las novitads tgi vignan telecargadas sen la pagina web digl cumegn.
- davart la fasa d'amprova da preschentar chest onn aint igl magazin da vacanzas "Aktuell" projects digl cumegn e las lavours ed incumbensas dallas diversas partiziuns.
- davart la dumonda dalla suprastanza da far part agl cres da codesch funsil Alvra, an vista alla pensiun digl administratour actual digl codesch funsil Surses igl fanadour 2023. Ins vegia ossa d'elaborar igls detagls correspondentes.
- davart igls termins dallas radunanzas communalas e digls cumegns d'urna Surses igl 2022.
- davart la radunanza d'orientaziun digls 24 d'otgover per preschentar igl sboz dalla revisiun dalla constituziun communal.

8. Varia

Or digl ravogl dalla radunanza communal vign fatg

- ena dumonda davart igl ulteriour proceder digl cumegn an connex cun la scadenza dalla concessiun dall'ovra electrica Marmorera igl 2035 e schi dess la pussebladad da far part alla cumischung correspondententa da cantun e cumegn.
- ena dumonda davart las tariffas dalla forza electrica igl 2023 an noss cumegn.

Igl mastral sera la radunanza communal allas 22.50 cun angraztger per la participaziun e giaveischa a tots en bung arrivo a tgesa.

Tinizong, igls

Igl mastral:

Igl actuar:

Leo Thomann

Beat Jenal